

## Dem Glodés Misch vun Heischent e leschten Äddi

Et ass elo iwwert d'Joer, datt de Glodés Misch zu Heischent begruewe gouf. Sécher feelt heen der Famill iwwerall, mee och am Döerf hôt heen e Lach hannerloss.

De Misch war säi ganzt Leewe laang eng dreiwend Kraaft. Vu klengem en hôt d'Konscht heen nët lassgelloss. E fréiere Schoukolleg ernënnert sech, wéi de Misch am 7. Schouljoer mat Waasserfaarwen – fir déi aner Kanner onvirstellbar – Szenen aus Märercher vun de Gebridder Grimm gemoolt hôt. Spéider sollt heen Usträcher ginn a sech zu Heischent etabléieren.

Als Bouf ass heen der Heischter Musik bäigetrotten. Mat der klenger Tromm ass heen 1935 fir d'éischt beim Hämmlsmarsch duerch d'Döerf gang.

Wee weess, wat fir Drem de Misch hat, a wat fir eng Pläng hee verwierklicht hätt, wann den Zweete Weltkrich net seng ganz Jugend zerstéiert hätt. D'Schicksal sollt et net gutt mat him mengen, an nëmme Méint no Krichsenn a fuerchtbarer Ongewëssheet bei senger Famill ass heen iwwer Tschenstochau aus russescher Gefangenschaft heemkomm.

Döerno war heen iwwer Joerzington net méi aus dem Heischter Veräinsleewe wechzedenken. Seef et bei de Jongen aus dem Döerf, an der Musik, am Gesank oder am

Foussball, seef et um Concert, um Match oder am Theater, de Misch hôt néirens gefeelt.

Seng grouss Léift sollt eewer d'Musik bleiwen. Keen Instrument war him friem. Ob kleng Tromm, Trompett, Baryton, Tuba oder Trombone, wou an engem Regëster e Lach war, ass heen agesprong.

Mee och am Comité vun der Heischter Musik hôt hee wäertvoll Aarbicht geleescht. Als Member vun 1957 bis 1989, als Vizepräsident vun 1970 bis 1989, hôt heen d'Leewen an d'Entwécklung vun Veräin staarkt beaflosst. Och an de Fest- an Organisationscomitéen 1971 an 1979 war heen onentbehrlich.

Als Autodidakt hôt heen et allerdings net beim Musiksplille beloss, mee heen hôt sich och selwer un d'Schreiwen an d'Arrangéiere ginn. Sou war heen ëmmer déi richtig Usprechpersoun, wann iergendwou eng musikalisch Begleitung gebraucht gouf.

Ob klengen Orchester bei engem Fösbal oder grësseren Danzorchester beim deemools bekannte Gromperfest, ob klenge, séier zesummegetrommelte Grupp ouni Numm oder mam Emblème „Stauséibleiser“ op der décker Tromm, de Kapp dervu war ëmmer de Glodés Misch. Net verwonnerlich och dofir, datt heen 1972 offiziell

zum Sous-chef vun der Heischter Musik ernannt gouf. Wéi vill vu senge Kollegen hôt heen an all Nopeschmusik ausgehollef, wou Nout um Mann war. Sou war et de Fall am August 1954 bei der Rochspréssioun zu Esch/Sauer. Dës Musik sollt heen ni méi ganz lasslossen, an am November 1982 ass heen do zum Dirigent ernannt ginn, eng Plaz, déi hee bis zu sengem Doud mat deem him eegenen Engagement an Äifer bekleet hôt.

D'Zesummeschaffe mam Misch am Veräin war net ëmmer einfach. Mat senger direkter an éierlicher Aart a Weis hôt hee méi wéi eng Kéier ugéckert. Bal ëmmer hunn allerdings seng Kritiker him nodréiglich misse Recht ginn. Duerch seng Erfahrung a säin Instinkt hôt heen ëmmer séier erkannt, wat zum Wöel vun Veräin wier, respektiv wat fir eng Entscheidung de Veräin spéider géif bedauern.

Vill Membere si schons vun der Musik gaang a ware séier vergeess. De Misch wäert duerch säi virbildlichen Asaz, säin aussergewöhnlich Kënnen, seng Spiichten an net zulescht duerch all déi handgeschriwwen Stëmme an de Proufsäll nach lang an der Métt vun der Musik bleiwen.

D'Musik vun Heischent  
D'Musik vun Esch/Sauer